



#### MONITORIZASAUN SAN NIA IMPORTÁNSIA

Realiza diagnóstiku no avaliasaun kona-ba seguransa ai-han no nutrisaun nian (Haree Fixa N.1) mak hakaat sira ne'ebé fundamentál atu identifika grupu vulnerável sira no atu komprende oinsá mak situaasaun iha nível lokál no nasional la'ó ba oin tuir tempu. Importante mós mak monitorizasaun husi programa no polítika públika sira-nian, tanba fundamentál katak programa no polítika sira ne'e bele adekua ba situaasaun ne'ebé iha kada momentu no bele konsekuente tuir pontudevista husi ninia rezultadu. Sociedade sivil bele dezempeña knaar ida importante tebes iha prosesu ne'e. Tuirmai ita apresenta ferramenta balun atu sociedade sivil hala'ó monitorizasaun.

#### DIAGNÓSTIKU LAIS KONA-BA SEGURANSA AI-HAN NO NUTRISAUN (DRSAN)

Metodolojia DRSAN nian permite atu komprende lalais SAN nia situaasaun iha nível lokál (poezemplu, iha comunidade ida ka rejiaun). Nia objetivu prinsipál mak: i)identifika problema no obstákulu prinsipál ba SAN; ii) husi rezultadu diagnóstiku, identifika liña jerál atu estrutura projetu no iniciativa lokál. Metodolojia konsiste husi elaborasaun kestionáriu sira ne'ebé aplika iha comunidade atu rekolle informasaun kona-ba ai-rin báziku SAN nian:

<b>Disponibilidade</b>	Informasaun kona-ba produsaun agríkula no kaptura (ba peska) no nia rendimentu; importánsia kona-ba produktu agríkula/peska nian no produktu ai-han nian sira seluk; kuantidade ne'ebé prodús no kuantidade ne'ebé família sira konsome.
<b>Asesu</b>	Analiza meus moris nian no orijen rekursus família sira-nian atu hetan ai-han; proporsaun husi família sira-nia rekursu mak sira uza atu sosa ai-han; estratéjia familiár sira-seluk atu garante asesu ba ai-han.
<b>Konsumu</b>	Informasaun kona-ba ai-han báziku família nian; lora ida refeisaun hira; distribuisaun ai-han iha família nia laran; uza ai-han tradisionál lokál; edukasaun kona-ba ai-han.
<b>Ai-han nia utilizaasaun</b>	Informasaun kona-ba kondisaun ijiéne, asesu no disponibilidade bee no saneamentu ne'ebé relasiona ho konsumu ai-han, porezemplu, asesu ba bee moos, sentina, prátika ijiéne nian, nsst.
<b>Estabilidade</b>	Tempu ne'ebé mak iha tinan nia laran família sira moris vulnerável liu, relasiona ho falta produktu ai-han nian; disponibilidade sistema atu oinsá bele rai (armazena) ai-han husi tempu ne'ebé iha barak liu ba tempu ne'ebé ladún iha, nsst.

Informasaun ida-ne'e, kona-ba comunidade sira, folin teb-tebes atu elabora projetu sociedade sivil nian ho objetivu atu inklui grupu vulnerável sira nia preokupasaun no problema. Ita bele kompleta metodolojia DRSAN ho ferramenta sira seluk hodi rekolle informasaun, hanesan porezemplu:

- **Disponibilidade:** Rejistu kona-ba udan; Folla Balansu Ai-han nian; Estudu Merkadu (folin no produktu sira); Planu Produsaun Agríkula
- **Asesu:** Kestiunáriu Domisiliár kona-ba Rendimentu; Analiza Meus Moris nian
- **Konsumu:** Kestiunáriu Domisiliár kona-ba Frekuénsia Ai-han nian no Diversidade Dieta nian; Estudu kona-ba saúde (rejonál ka komunitáriu)
- **Estabilidade:** Estudu antropométriku ba labarik; Sistema alerta lais; Análize Vulnerabilidade (risku)

## DIAGNÓSTIKU INSTITUSIONÁL KONA-BA POLÍTICA PÚBLIKA SIRA-NIAN

Análize kona-ba SAN nian institusionalidade mak hakaat fundamentál atu monitoriza polítika pública sira. Análize ida-ne'e bele halo liuhusi sosiedade sivil ka ho nia partisipasaun no permite atu foti konkluzaun kona-ba operasionalidade no polítika sira-nia impaktu. Análize ida-ne'e tenke halo tuir perspetiva Direitu Umanu ba Ai-han Adekuada (DHAA). Uza Diretriz Voluntária kona-ba Direitu ba Ai-han (Haree Fixa N.2) ka kona-ba Asesu ba Rai no Rekursu Naturál sira ( Haree Fixa N.4) folin teb-tebes. Liuliu, ita destaka kestaun-xave tuirmai mak presiza analiza:

<b>Kuadru Konstitusionál no Legál</b>
<ul style="list-style-type: none"><li>• Konstituisaun nasaun nian rekoñese direitu ba ai-han? Karik loos, oinsá?</li><li>• Iha lejislasaun espesífika kona-ba SAN no DHAA (porezemplu, Lei SAN nian ka Lei DHAA nian)?</li><li>• To'ó iha ne'ebé ona mak SAN no DHAA refleto iha lejislasaun setoriál nasaun nian?</li><li>• Lejislasaun ne'ebé iha implementa ka la'e?</li><li>• Saida mak falta ka limitasaun prinsipál iha kuadru legál?</li></ul>
<b>Kuadru Polítika Pública sira</b>
<ul style="list-style-type: none"><li>• Iha ona estratéjia nasionál ruma husi SAN ka estratéjia atu kombaté kí'ak?</li><li>• Formulasau estratéjia sira-ne'e haree ba diagnóstiku préviu adekuaudu no ba partisipasaun husi parte sira oioin ne'ebé iha interese?</li><li>• Iha polítika makro no/ka setoriál sira seluk ne'ebé relevante ba SAN no DHAA?</li><li>• Konteúdu no forma implementasaun polítika sira ne'e tuir grupu vulnerável sira nia problema?</li><li>• Saida mak falta ka limitasaun prinsipál sira kona-ba polítika pública nian?</li></ul>
<b>Kuadru Institusionál no Partisipasaun Sosiál</b>
<ul style="list-style-type: none"><li>• Instituisaun saida mak relevante ba SAN no DHAA?</li><li>• Saida mak limitasaun prinsipál kona-ba mandatu, performance, kapasidade?</li><li>• Iha mekanizmu kordenasaun intersetoriál ruma? Karik iha, oinsá la'ó hela?</li><li>• Oinsá promove diálogo polítiku no partisipasaun sosiál nian?</li></ul>
<b>Kuadru Orsamentál</b>
<ul style="list-style-type: none"><li>• Luta hasoru hamlaha no SAN refleto tiha ona iha Orsamentu Jerál Estadu nian?</li><li>• Oinsá mak fahe orsamentu liuhusi setór oioin?</li><li>• Rekursu sira ne'ebé adekuaudu atu implementa polítika sira ne'ebé aprova tiha ona iha ka la'e?</li><li>• Estadu ho SAN uza hela rekursu másimu ne'ebé disponível?</li><li>• Kona-ba rekursu finanseiru sira saida mak falta?</li></ul>

## MONITORIZASAUN NO PARTISIPASAUN SOSIÁL

Sosiedade sivil iha knaar fundamentál ba polítika pública sira-nia jestaun no kontrolu. Partisipa signifika hala'ó intervensaun iha faze hotu polítika sira-nian, dezde nia formulasaun, implementasaun, monitorizasaun no avaliasaun.

Atu partisipasaun sosiál bele efetivu liu presiza mós sosiedade sivil ida ne'ebé organizada (porezemplu, liuhusi rede temática sosiedade sivil nian – Haree Fixa N.7). Importante mós katak governu bele iha abertura ba diálogo.

Eziténsia mekanizmu institusionál sira ne'ebé garante partisipasaun kualifikada sosiedade sivil nian, hanesan Konsellu Nasionál SAN nian ka Konsellu Lokál SAN nian, mak ezemplu ne'ebé bele ajuda hadi'ak transparénsia no jestaun pública polítika nian. Importante tebes atu sosiedade sivil uza fatin sira ne'e atu apresenta konkluzaun kona-ba sira-nia análise no avaliasaun no atu propoin rekomendasaun ba setór oioin governu nian.

Autór: ATUAR – Associação para a Cooperação e o Desenvolvimento. Portugal (<http://www.actuar-acd.org/>)

*Publikasaun ne'e produzir ho apoiu husi União Europeia. Ho konteudu eksklusiva ba responsabilidade HASATIL no mos labele, iha kasu ruma, konsidera nudar expresaun ba posisaun União Europeia"*

Projetu Asistencia Técnica no Haforsa Kompetensia HASATIL nian no Organizaun Sosiedade Sivil ba Dezenvolvimentu Rural Iha Timor Leste (FED/2012/284-340)

Ho financiamento husi:



Koordenasaun:



Parseirus:



Asosiadu:

